



16 APR, 2024

PETRA pelawa pihak berkecenderungan bida pembelian bekalan elektrik hijau

Sinar Harian, Malaysia



Page 1 of 2

PETRA pelawa pihak berkecenderungan bida pembelian bekalan elektrik hijau

PUTRAJAYA - Kementerian Peralihan Tenaga dan Transformasi Air (PETRA) mempelawa pihak yang berminat dan berkecenderungan menyertai proses bidaan pembelian bekalan elektrik hijau untuk disalurkan ke sistem bekalan elektrik Singapura.

Menerusi kenyataan, PETRA memaklumkan proses bidaan itu dilaksanakan menerusi platform Energy Exchange Malaysia (ENEGEM).

Ujar kementerian itu, pembidaan bagi perdagangan bekalan elektrik hijau merentas sempadan ke Singapura ini akan dimulakan dengan pelaksanaan projek rintis berjumlah 100 megawatt (MW) menggunakan rangkaian infrastruktur sambung tara sedia ada antara

Semenanjung Malaysia dan Singapura.

"Antara intipati pelaksanaan proses bidaan di bawah projek rintis ini adalah seperti terbuka kepada pembida tenaga boleh baharu (TBB) yang mempunyai lesen penjanaan atau lesen peruncitan bekalan elektrik untuk pasaran Singapura," katanya pada Isnin.

Pembida TBB yang berminat juga perlu berdaftar untuk menyertai proses bidaan yang dilaksanakan selain akan dinilai menerusi proses pra-kelayakan.

"Mereka yang berjaya akan mendapat notifikasi melakukan bidaan pembelian pada hari bidaan dan pembida yang berjaya akan menandatangani Perjanjian Pembekalan Elektrik Tenaga Boleh Baharu

dengan *Single Buyer* untuk urusniaga bekalan elektrik hijau," ujar PETRA.

Jelas kementerian itu, pembida TBB yang berminat boleh mendaftarkan hasrat penyertaan melalui laman sesawang PETRA atau *Single Buyer* mulai Selasa.

"PETRA yakin pelaksanaan bidaan ini akan membolehkan Malaysia memperkukuhkan lagi kerangka kerja pembekalan elektrik merentas sempadan, di samping membuka peluang pembangunan serta usaha sama bidang TBB yang lebih luas," katanya.

Kerajaan sebelum ini bersetuju menubuhkan ENEGEM bagi melaksanakan perdagangan bekalan elektrik hijau merentas sempadan ke negara jiran.